



Kamis, 16 Maret 2023

Ogen: Jop 42:1-2



Nandai Tuhan Bas Kiniseran



S i entebu e lenga tentu tambar, si pagit e lenga tentu racun, enda sada kuan kuan karo megati ibelasken tupung lit teman nenganami perbeben entah pinakit. Pagit ras entebu enda situasi sipegancihen reh ku bas kegeluhenta. Labo terelakken adi situasi pagit entah entebu e seh man banta. Si perdiateken kegeluhen Jop maka pernah ia nenganami situasi entebu, ia bayak namura i bas jamanna, anak-anakna ersada perarih, ia isegani kalak si enterem. Kenca nenganami situasi si entebu e, reh ka situasi si pagit si man alonken, erta kebayaken kerina kernep, anak-anak pe kerina mate, sakit pinakit turah mekelek, ndehara pe ngajuk guna nadingen Tuhan. Si pagit ndai ertindih-tindih. I bas ndalani si pagit e menam Jop pe ngelabuh. Kai nari nge si jadi man bana? Tupung reh pe teman-temanna, tempa ngapuli tapi enggo ndabuh ku bas nggargari kesalahen Jop. Teman ndai pe lanai jadi teman.

Tupung si e kerina jadi, iukur-ukuri Jop alu mbages, dungna ibukuina ukurna janah iturikenna man Tuhan nina: Kai pe si jadi man bangku e, kerina tangkas i bas Tuhan, janah kai si ibahan Tuhan ulihna kerina mehuli. Si enda ngatakensa Jop ngendesken kerina situasi geluhna man Tuhan alu erpengarapen lit denga si mehuli si man timan i bas Tuhan nari. Aminna gundari pagit, salih nge pagi ku si entebu. Em gelarna pengarapen.

Arah kegeluhen Jop enda banci kita erlajar maka kiniseran si jadi man banta banci jadi dalam guna kita nandai Dibata alu payo. Dibata e ngasup erbahan kai pe man banta guna kiniulin geluhnta. Adi Dibata erdahin situhuna kerina guna kiniulinta. Banci saja pagit i bas ngalakensa tapi banci jadi tambar gelah kita tetap ermeteruk ukur, dengen patuh ku bas pengaturenNa. Kai si isuraken Dibata man banta labo pernah sia-sia.